
Saopćenje za medije

10.01.2018. Sarajevo

U vezi sa medijskim izvještavanjima u kojima se tvrdi da Federalni zavod za statistiku vrši mjerenje „Potrošačke korpe” i da o istoj objavljuje zvanične podatke, obavještavamo javnost o sljedećem:

- Federalni zavod za statistiku od 2008. godine ne izračunava i ne objavljuje indikator „Potrošačka korpa”. Potrošačka korpa koja se objavljivala do 2008. godine je sadržavala najvažnije životne namirnice iz kategorije ishrane i pića, te je po sadržaju i količinama predstavljala minimum potreba četveročlanog domaćinstva u segmentu ishrane. Ovaj indikator se obračunavao na osnovu metodologije koja je razvijena od strane bivšeg Saveznog zavoda za statistiku iz perioda SFRJ. U Evropskoj Uniji ne postoji standard za izračunavanje minimalne potrošačke korpe niti je proizvodnja ovog podatka obavezujuća u procesu pridruživanja EU, tako da se o njenoj usklađenosti sa EU standardima ne može govoriti.
- Indeks potrošačkih cijena se obračunava u svrhu praćenja promjene kretanja cijena proizvoda i usluga koje domaćinstva kupuju radi lične potrošnje, a ne u svrhu definisanja iznosa potrošačke korpe.
- Na osnovu podataka prikupljenih Anketom o potrošnji domaćinstava izračunavaju se prosječni mjesečni izdaci domaćinstava koji se po definiciji i metodološkom pristupu ne mogu izjednačiti sa potrošačkom korpom koja je ranije objavljivana. Iznos od 1.508,04 KM, koji se pominje u medijima se odnosi na prosječne mjesečne izdatke domaćinstva sa prosječnim brojem članova u Federaciji BiH, a ne na iznos potrošačke korpe. Kao što smo naprijed naveli, za razliku od potrošačke korpe koja se ranije objavljivala, prosječni mjesečni izdaci domaćinstva se ne odnose na minimalne potrebe nego na prosječnu potrošnju domaćinstava koja pored izdataka za hranu i piće obuhvata i izdatke za: alkoholna pića i duhan; odjeća i obuća; stanovanje, voda, električna energija, plin i drugi energenti; namještaj, kućanski uređaji i redovno održavanje kuće; zdravstvo; prevoz; komunikacije; obrazovanje; rekreacija i kultura; restorani i hoteli i ostala dobra i usluge. S obzirom na navedeno, prosječna potrošnja domaćinstava nikako se ne može poistovjetiti sa potrošačkom korpom.
- U statističkom biltenu broj 255/2017 „Cijene 2016” nigdje se ne pominje termin „potrošačka korpa”. Proizvodi i usluge koji su predmet prikupljanja cijena radi izračuna indeksa potrošačkih cijena ne predstavljaju potrošačku korpu niti proizvode i usluge koje troši svako domaćinstvo na području Federacije BiH, već su u pitanju proizvodi i usluge koji su najreprezentativniji u ukupnoj potrošnji domaćinstava Federacije BiH.

(KRAJ)

Odsjek za odnose sa javnošću i biblioteka

Federalni zavod za statistiku

Ul. Zelenih Beretki broj 26.

+387 (33) 407 018

+387 (33) 226 151

fedstat@fzs.ba

www.fzs.ba